

TEZĂUR LITURGIC
19 SEPTEMBRIE

ACATISTUL
SF. CNEAZ
IGOR-GHEORGHE
DE LA
CERNIGOV ȘI KIEV
II



MOSCOVA, 2000



Акафист

святому благоверному князю

Игорю Черниговскому и

Киевскому

Кондак 1

Избранный от княжеского служения к тесному пути страстотерпца Христова, воистину доблей страдалец явился еси, великий благоверный княже Игорю. Сего ради Церковь Христова ныне ублажает тя, призывая всех верных чад своих вопити тебе тако:

Радуйся, святой благоверный великий княже Игорю!

Икос 1

Ангелов Творец и Царю всех, видя чистого сердца твоего изволение, к Богу стремление и чистоту голубиную, призва тя к славному подвигу делания монашеского, уз страдальца и исповедания мученического, иже с ангельским терпением и кротостью претерпел еси. Сего ради явился еси утверждение Державы Российския, исповедников славо и мучеников похвало. Мы

же, дивясь таковому подвигу твоему,
восхваляем тя по долгу званиими сими:
Радуйся, яко Царь Давид, кротостью своею Богу
угодивый!

Радуйся, венца княжеского, свободы и славы
земной лишенный!

Радуйся, к лику стратотерпцев причтенный!

Радуйся, все мучения кротко претерпевый!

Радуйся, яко в сонме преподобных Богу
предстоиши!

Радуйся, яко и в лике мучеников ныне достойно
веселишися!

Радуйся, святой благоверный великий княже
Игоре!

Кондак 2

Видяще тебя звероподобные мучители твои
достойна венца великого князя киевского, иже
по праву тебе принадлежа, распыхахуся на тя
злобою, тщашася тебя отцовского наследства
лишити и сим коварством завладети, Бога не
бояся и человек не срамляся, не ведуще пети:
Аллилуйя!

Икос 2

Разум неуразумеваемый явился жестокому веку
сему славное житие твое, о славный
страстотерпче великий княже Игоре! Како,
земной славы, княжеского венца, иже по праву

тебе принадлежа, и самой свободы лишен,
ничего же супротив мучителей своих рекл еси, в
исполнение воли Божия волю свою предавая.

Сего ради воспеваем ти сицевая:

Радуйся, аки агнец кроток, на заколение
мучителями ведомый!

Радуйся, Христу тем уподобивыйся!

Радуйся, лишение княжеского венца в волю
Божию предавый!

Радуйся, ничего же противу пострижения в
монашество воспротивыйся!

Радуйся, суетной земной славы лишенный!

Радуйся, к воинству Небесному причтенный!

Радуйся, святой благоверный великий княже
Игоре!

Кондак 3

Сила Вышнего осени тогда тебя, о славный
страстотерпче, егда недостойная овцы твои,
преступив крестное целование, гордо рекли еси:
«Не хотим быть в наследстве», отреклись от тебя,
великий княже Игоре, не ведуще пети: Аллилуйя!

Икос 3

Имуще Заступника Самого Господа, Творца
всяческих, о славный княже Игоре, ты,
преданный клеветами своими, четыре дня, аки
Давид в пустыне, в болотах киевских скрывался
еси, от мести нечестивых друзей своих и

предавшей тебя паствы спасения ища. Сего ради мы, таковой людской злобе и неблагодарности дивясь, величаем тя тако: Радуйся, в болотах киевских, аки Давид в пустыне, спасения искавый.

Радуйся, житие свое всецело предавый в волю Божию.

Радуйся, от неблагодарной паствы своя до нищеты смирившийся!

Радуйся, от нея оболгание, в узы предание и до самой смерти умучение приявый!

Радуйся, кротостью своим сродникам Борису и Глебу уподобивыйся.

Радуйся, венцем мученическим, подобно им, увенчанный.

Радуйся, святой благоверный великий княже Игоре!

Кондак 4

Бурею внутрь имея помышлений сумнительных, нечестивии соотечественники твои, злобою воздвигаемы, посадили тя в поруб, идеже ни окон, ни дверей. Сие страшное злодеяние накануне славного праздника Происхождения Честных Древ Креста Господня, Всемилоостивого Спаса и Пресвятой Богородицы совершиша, к беззаконию беззаконие преложиша, не введуще пети: Аллилуйя!

Икос 4

Слышаша о таком горе, в земле русской совершившемся, все праведнии люди русские над твоей судьбой плакася горько, о умалении любви, верности и покорности воле Божией и властям, от Него поставленным: «Увы! Где любовь?», сокрушаясь. Видя в тебе, о страстотерпче Божий, нового молитвенника и печальника родной земли, хотя и сана княжеского лишеного, но тем паче Богом прославленного, величали ты сице:

Радуйся, печальниче и заступниче Российския земли!

Радуйся, верный о нас к Богу ходатаю!

Радуйся, достойный о нас Богу предстоятелю!

Радуйся, о всех обидимых молитвенниче!

Радуйся, яко сам узы претерпевый, о всех в узах находящихся молитвенниче теплый!

Радуйся, за всех невинно пострадавших и обидимых славный к Богу ходатаю!

Радуйся, святой благоверный великий княже Игоре!

Кондак 5

Боготечней звезде всей Земле Российской явилось славное житие твое, о страстотерпче великий княже Игоре. На тебе сбыся словеса Божия, яко сила Божия в немощи совершается. Ты, земной славы, могущества и свободы лишен,

яко светильник пред Богом явился еси, в сокровенных сердца поя Тому: Аллилуйя!

Икос 5

Видяще тебя, о славный страсотерпче княже Игоре, в порубе тяжкой болезнью сокрушенного, так что осемь дней ни пить, ни есть не возмог еси, но духом могуча, так что ни токмо иночество с именем Гавриил, но и схиму великую с именем Игнатий принял еси, тем всецело не токмо от власти и княжеского венца, по праву тебе принадлежащего, но и от мира всецело отвергшись, отцом лжи распаляемы, паче того распыхахуся на тя злобою. Сего ради сбыся на тебе слово Писания, яко «предаст брат брата на смерть», и «убивающие вас будут думать тем службу приносить Богу», «претерпевый же до конца спасется» (Матф 10-21). Тебя, до конца все претерпевшему и ныне о нас Творцу всех молящемуся, мы, меньшии братия твои, ублажаем похвалами сими:
Радуйся, насильственное в монахи пострижение яко волю Божию приявый!
Радуйся, яко тем угоден Богу паче славных иноков ставший!
Радуйся, яко верный раб Христов, до конца все претерпевый!
Радуйся, венец страдальческий от Господа приявый!

Радуйся, яко в лике преподобных твое имя
ублажается!
Радуйся, яко и в сонме мучеников достойно
предстоиши!
Радуйся, святой благоверный великий княже
Игоре!

Кондак 6

Проповедует Церковь Российская тебя, княже
Игоре, яко славного страстотерпца Христова, ты
бо, гонения, славы земной лишение, в узы
темничные заключение и муки смертные от
своих рабов прияша, ныне на небесех достойно
веселишися, поя Богу: Аллилуйя!

Икос 6

Возсиял еси в Земле Российской яко столп и
основание Истины, иже есть Господь наш Иисус
Христос, и утверждение Державы Российския,
яко теплого молитвенника о людях русских и
непреложного ходатая о всех нуждах наших к
Владыке всех ты вемы. Сего ради ублажаем тя
тако:

Радуйся, жестоких нравов суетноговека сего
обличителю!

Радуйся, Ангел Божиих и всех святых сожителю!

Радуйся, о Земле Русской молитвенниче
неусыпный!

Радуйся, до самого Страшного Суда о ней пред

Богом ходатаю!

Радуйся, всем пекущимся о благе Родины твоея
скорый помощниче!

Радуйся, всем верным чадам Церкви
Православной дивный заступниче!

Радуйся, святой благоверный великий княже
Игоре!

Кондак 7

Хотя тебя, о святой княже, законного венца
княжеского и самой жизни лишити, беззаконная
паства твоя, исконным врагом рода
человеческого рспаляема, замыслиша ковы на
тебя, законного правителя своего, не желая
славу законную воздать Богу: Аллилуйя!

Икос 7

Нового страсотерпца Христова и славного
Русской земли заступника вемы тя, о святой
княже Игоре, ты бо, смертного часа чая, перед
чудотворной иконой Богоматери, иже
Игоревской наречеса, пав в слезах, во время
Бескровной Жертвы Господней, тако молился:
«Господи! призри на немощь мою, чтобы, уповая
на Тебя, мог я перенести все; благодарю Тебя,
что Ты смирил меня; удостои взять меня из
этого мятежного и мрачного мира в Твой свет».
Мы же, дивясь твоей неизреченной кротости и
покорности воле Божией, ублажаем тя

похвалами сими:

Радуйся, всеконечно предавайся в волю Божию!

Радуйся, венцем мученическим за то увенчанный!

Радуйся, скорбь свою перед иконой Богородицы изливавай!

Радуйся, яко икона та молитв твоих ради чудодействует!

Радуйся, от ближних своих смерть жестокою приявай!

Радуйся, за то на небесех для их потомков пред Богом ходатаем славным ставый!

Радуйся, святой благоверный великий княже Игоре!

Кондак 8

Странна бысть неверующим людям честная кончина твоя, о святой благоверный княже Игоре, како всю жизнь и смерть свою в руки Божии предал еси, ничего же противу звероподобных мучителей рекл еси, не ведущих пети: Аллилуйя!

Икос 8

Весь бо вышних пребываеши, о святой благоверный княже Игоре, Творцу всяческих в соборе святых предстоя, но и нас нижних не оставляеши ходатайством твоим, о всех нуждах наших Владыку всех умоляя. Сего ради

слышаши от нас сия:

Радуйся, о нуждах всех верных славный к Богу ходатаю!

Радуйся, угодниче Божий и Пресвятая Богородицы!

Радуйся, всея Земли Русския теплый молитвенниче!

Радуйся, страже ея неусыпный!

Радуйся, о всех в ней страждущих молитвенниче теплый!

Радуйся, до Страшного Суда Христова о ней пред Богом ходатаю!

Радуйся, святой благоверный великий княже Игоре!

Кондак 9

Всякия верныя чада Православныя Церкви и пекущиеся о благе Земли Российския имеют тя верного заступника и теплого молитвенника пред Престолом Господним. Сего ради и слышаши от всех нас: Аллилуйя!

Икос 9

Ветия многовещанныя суетного века сего видим о тебе яко рыбы безгласныя, славный княже Игоре, недоумеют бо разумети, како ни единого гласа противу мучителей своих глагола, венец страдальческий восприял еси, ныне славный заступник всем чадам Православныя Церкви и

властям Державы Российской пребываеши. Сего ради по всем весям страны нашия слашаши похвалы сия:

Радуйся, мучителей своих пред кончиной кротко обличивый!

Радуйся, венцем страдальческим от Господа увенчанный!

Радуйся, всем житием своим сродником Борису и Глебу последовый!

Радуйся, вместе с ними к собору мучеников причтенный!

Радуйся, Борису и Глебу помощниче в защите православных!

Радуйся, всем неправедно гонимым покровителю!

Радуйся, святой благоверный великий княже Игоре!

Кондак 10

Спасти хотя душу, славы земной лишение, в узы заключение, болезни и страдания и самой жизни лишение яко волю Божию приял еси, о славный угодниче Божий княже Игоре. Ныне на небесах Господу предстоиши, поя Ему: Аллилуйя!

Икос 10

Стена еси всем надеющимся на помощь твою и служить Державе Российской хотящим является

заступление твое, о святой княже Игоре. Сего ради ныне Святая Церковь, восхваляя тя, научает нас воспевати тебе тако:

Радуйся, Страны Российской покровителю!

Радуйся, всех верных защитителю!

Радуйся, властей ея премудрый наставниче!

Радуйся, от всех бед наш надежный защитниче!

Радуйся, всем добре начальствующим в земле Российской споспешниче!

Радуйся, всем православным в ней надежный помощниче!

Радуйся, святой благоверный великий княже Игоре!

Кондак 11

Пение непрестанное о тебе приносят все верныя чада Православныя Церкви, о благоверный княже Игоре, во всяких бо нуждах наших помогаеши, обидимых заступаеши, во всех обстояниях жизни нашея волю Господню творити научаеши. Сего ради непрестанно Богу о тебе поем: Аллилуйя!

Икос 11

Светозарному светочу, во тьме века сего светящему было подобно славное житие твое, о страстотерпче Христов славный княже Игоре. Како бо, славы княжеской, свободы и самого жития лишен, всего себя в волю Господню

предал еси, во всех обстояниях жизни нашея видеть волю Божию, благую, совершенную и все во благо устрояющую нас научая. Сего ради, о кроткий исповедниче Христов, источник разума Божественного явился еси, на похвалы нас подвизая сицевыя:

Радуйся, разуме, Духом Святым просвещенный!

Радуйся, Самим Подвигоположником Христом Богом наученный!

Радуйся, учащий во всем видети волю Божию, благую и совершенную!

Радуйся, о всех страдальцах теплый к Богу молитвенниче!

Радуйся, всех пекущихся о благе Церкви и Отечества добрый споспешниче!

Радуйся, всех защитников их добрый защитниче!

Радуйся, святой благоверный великий княже Игоре!

Кондак 12

Благодати источник неиссякаемый яви тебя благодати Податель, о стастотерпче Христов великий княже Игоре. Сего ради все верныя вопиют Богу о тебе: Аллилуйя!

Икос 12

Поюще твое славное житие, о святой страдалец Христов благоверный княже Игоре, ныне Святая

Церковь, яко славного угодника Божия тебя имея, достойно веселится. Сего ради по всем концам Земли Российския верныя чада ея вохваляют тя тако:

Радуйся, всем обидимым помощниче!

Радуйся, неправедно гонимым защитниче!

Радуйся, во всех скорбях заступление!

Радуйся, унывающих утешение и ободрение!

Радуйся, страдальцев славо!

Радуйся, всех мучеников похвало!

Радуйся, святой благоверный великий княже Игоре!

Кондак 13

О, святой благоверный княже Игоре, Земли Русския печальниче и заступниче, всех обидимых покровителю и неправедно гонимых утешение! Нынешнее наше моление прими и от всякия скорби, бед и напасти избави всех, Богу о тебе вопиющих: Аллилуйя!

Сей Кондак глаголи трижды, затем Икос 1 и Кондак 1

Молитва

О мужественный исповедниче Христов, великий благоверный княже Игоре, мучеников славо, стрстотерпцев венче и преподобных украшение! Ты во дни земного своего жития славный путь

исповедника и страстотерпца Христова прошел, воистину всем вся явился еси. Ты, царствия земного лишен, славный ходатая Царствия Небесного всем к тебе прибегающим являешься. Ты, земной отрады и утешения лишен быв, воистину приобрел еси благодать всем страдальцам скорби их облегчати утешение тем даровати. Ты, лишения, тугу, в узы темничные заключение восприяв, воистину приобрел еси благодать всем скорбящих утешати, от уз разрешати и скорбь на радость прилагати. Ты, всего земного лишен, не токмо Царствие Небесное приобрел еси, но благодать всем к тебе обращающимся добре житие их устроить, к Царствию Небесному всех нас путеводя. Ей, славный угодниче Божий! Веруем, что вся сия испросити нам можеш. Сего ради молим тя: будь нам верный ходатай и теплый молитвенник пред Престолом Господним. Испроси властям нашим силу, мудрость, терпение, во всем благое поспешение и на враги одоление, пастырям — благодать и премудрость Божию, иже вести ко спасению пасомых, добрый путь в Царствие Христово всем нам указуя. Всем обидимым дай терпение, всяческих скорбей совершенное их избытие и на радость тех скорое преложение, обидимым — страх Божий и к братолюбному добродетельному

жительству обращение, судиям — праведность и нелицеприятие, иже творить суд во славу Божию, лишь Одному Судии Праведному из всех сил угождая и подражая. Напаствуемых от всяких напастей избавь, печальным будь утешитель, тужащим — отрада и утешение, да тако, тесный путь сего жития прошед, непреткновенно пройдем воздушные мытарства миродержителя князя сего и достигнем рая нам вожделенного, иже будем с тобой и со всеми святыми славить всечестное и великолепное имя Вседержителя Христа Бога нашего во веки веков. Аминь.

